

## 6. ՄԱՐԴԱՀԱՄԱՐԻ ԱՆՑԿԱՑՈՒՄԸ

2011թ. հոկտեմբերի 12-21-ը Հայաստանի Հանրապետությունում անցկացվեց մարդահամար՝ մարդահամարի հարցաթերթը հարցման եղանակով լրացնելու միջոցով:

Ողջ հանրապետությունում բնակչությունը հաշվեգրվեց հատուկ սահմանված պահի՝ հոկտեմբերի 11-ի լույս 12-ի կեսգիշերի՝ ժամը 12-ի դրությամբ:

ՀՀ 2011 թ. մարդահամարի հաշվառման արդյունքում ստացվեցին բնակչության երկու կատեգորիաների վերաբերյալ տվյալներ.

• **Մշտական բնակչություն**, որը ձևավորվում է մարդահամարի ժամանակ մշտապես ներկա և ժամանակավոր բացակա անձանց ընդհանուր թվաքանակների հանրագումարից:

*Մշտապես ներկա* բնակչություն համարվում են տվյալ համայնքում հաշվառված, մարդահամարի պահին ներկա անձինք և տվյալ համայնքում չհաշվառված, սակայն այդտեղ, մարդահամարի հաշվառման պահի դրությամբ, մեկ տարուց ավել բնակվող ներկա անձինք:

*Ժամանակավոր բացակա* են համարվում այն անձինք, ովքեր մշտապես (սովորաբար) բնակվում են տվյալ համայնքում՝ քաղաք, գյուղ, տուն (շինություն), սակայն մարդահամարի կրիտիկական պահին գտնվել են տվյալ քաղաքային կամ գյուղական համայնքի (այդ թվում՝ հանրապետության) սահմաններից դուրս, և նրանց բացակայության տևողությունը, նշված պահի դրությամբ, չի գերազանցել մեկ տարին:

• **Սռկա բնակչություն**, որը ձևավորվում է մարդահամարի ժամանակ մշտապես ներկա և ժամանակավոր ներկա հաշվառված անձանց ընդհանուր թվաքանակների հանրագումարից:

*Ժամանակավոր ներկա* են համարվում այն անձինք, ովքեր մարդահամարի կրիտիկական պահին գտնվել են տվյալ համայնքում՝ քաղաք, գյուղ, տուն (շինություն) կամ ժամանակավոր կացատեղ հանդիսացող կազմակերպություններում, սակայն նրանց մշտական բնակավայրը գտնվում է տվյալ համայնքի (այդ թվում՝ հանրապետության) սահմաններից դուրս, և նրանց գտնվելու տևողությունը, նշված պահի դրությամբ, չի գերազանցել մեկ տարին:

Ինչպես ՀՀ 2001 թ. մարդահամարի ժամանակ, այնպես էլ ՀՀ 2011թ.մարդահամարի ժամանակ մարդահամարի դիտարկման միավոր է հանդիսացել **տնային տնտեսությունը**՝ անհատական և խմբային (ինստիտուցիոնալ):

### 1. Անհատական տնային տնտեսություն է համարվում.

- առանձին բնակելի միավորում կամ դրա մի մասում բնակվող **մեկ անձից բաղկացած տնային տնտեսությունը**, երբ անձն ինքնուրույն ապահովում է իր բոլոր կենսական կարիքները, ընդհանուր տնտեսություն վարելու համար տվյալ բնակելի միավորում բնակվող այլ անձանց հետ չի միավորում իր միջոցները, կամ
- առանձին բնակելի միավորում, դրա մի մասում կամ մի քանի շինություններում համատեղ բնակվող երկու և ավելի անձանցից բաղկացած տնային տնտեսությունը, որի անդամներն իրենց կենսական կարիքներն



ապահովում են ընդհանուր տնտեսությունն վարելով՝ ամբողջությամբ կամ մասամբ միավորելով իրենց միջոցները: Այդ անձինք կարող են կապված լինել ազգակցական կամ ամուսնական կապով, չլինեն ազգական, կամ ն՝ մեկը, ն՝ մյուսը:

**2. Խմբային (ինստիտուցիոնալ) տնային տնտեսություն** են կազմում այն անձինք, ովքեր մշտապես բնակվում են մանկատներում, գիշերօթիկ դպրոցներում, հատուկ նշանակության դպրոցներում (օրինակ՝ երկկողմանի կամ միակողմանի ծնողազուրկ երեխաների գիշերօթիկներում), տարեցների և հաշմանդամների սոցիալական սպասարկման կազմակերպություններում, կրոնական հիմնարկներում (օրինակ՝ մենաստաններում), քրեակատարողական հիմնարկներում, այսինքն՝ կազմում են համատեղ բնակվող բնակչության խմբեր, սովորաբար ենթարկվում են ընդհանուր կանոնների և սնվում են համատեղ: Նման տնտեսություններով բնակվող բնակչության կազմի մեջ չեն մտցվում սպասարկող անձնակազմի տնային տնտեսությունները:

ՀՀ 2011թ. մարդահամարի ժամանակ յուրաքանչյուր տնային տնտեսության համար լրացվել է առանձին հարցաթերթ:

**Մարդահամարի հաշվառման գործընթացն իրականացվեց հետևյալ փուլերով և ժամկետներում.**

1. հոկտեմբերի 8–10–ը՝ նախնական շրջագայություն,
2. հոկտեմբերի 12–21–ը՝ մարդահամարի անցկացում,
3. հոկտեմբերի 22–26–ը՝ վերահսկիչ շրջագայություն:



## 6.1. ՏՆԵՐԻ (ՇԻՆՈՒԹՅՈՒՆՆԵՐԻ) ՆԱԽՆԱԿԱՆ ՇՐՋԱԳԱՅՈՒԹՅՈՒՆ

Նախնական շրջագայությունը նախապատրաստվել էր հրահանգիչ-հսկիչների կողմից՝ նպատակ ունենալով հաշվարարներին ծանոթացնել իրենց հաշվային տեղամասերի սահմաններին: Հաշվարարները սահմանված ժամկետում այցելեցին իրենց տեղամասում տեղակայված բոլոր տներն ու շինությունները՝ համապատասխան նշումներ կատարելով իրենց հուշատետրում, բնակիչներին տեղեկացնելով անցկացվելիք մարդահամարի մասին, անհրաժեշտության դեպքում պարզաբանլով դրա անցկացման նպատակներն ու խնդիրները և պարզելով, թե հոկտեմբերի 12-21-ը ընկած ժամանակահատվածում երբ է նպատակահարմար այցելել տվյալ տնային տնտեսություն՝ նրա անդամներին հաշվառելու համար:

Հաշվարարները մարդահամարի անցկացման համար անհրաժեշտ նյութերը (հարցաթերթեր, հսկիչ թերթեր (Ձև 4), մարդահամարն անցնելու մասին տեղեկանք (Ձև 5), վերահսկիչ փաստաթուղթ (Ձև 6), հաշվային տեղամասի ամփոփ տեղեկագիր (Ձև 6-քաղաքային, գյուղական), ուղեկցող թերթ (Ձև 10), հաշվարարի հուշատետր՝ քաղաքներում (Ձև 11- քաղաքային) և գյուղերում (Ձև 11-գյուղական), գրություն այն անձանց, ում դժվար է տանը գտնել, գոյության միջոցների աղբյուրների ցանկ, հաշվարարի վկայական, պայուսակ, հաշվային տեղամասի հատակագիծ, գրենական պիտույքներ) հրահանգիչ-հսկիչներից ստացան միայն մարդահամարի նախօրեին:



## 6.2. ՄԱՐԴԱՀԱՄԱՐԻ ՏՎՅԱԼՆԵՐԻ ՀԱՎԱՔԱԳՐՈՒՄ (ԱՆՑԿԱՑՈՒՄ)

Մարդահամարի հաշվառումն անցկացվեց հրահանգավորված հաշվարարների կողմից 10 օրվա ընթացքում՝ հոկտեմբերի 12–21–ը ներառյալ: Հաշվարարների կողմից հարցաթերթի հարցերը բանավոր ընթերցելուց հետո բնակչության կողմից տրված պատասխանները լրացվում էին հարցաթերթի համապատասխան հատվածում: Մարդահամարի մյուս կարևոր պահանջներից մեկն էլ այն էր, որ բնակչության մասին տեղեկությունները հարցաթերթերում լրացնելիս հաշվարարը չէր պահանջում պատասխանը հաստատող որևէ փաստաթուղթ: Իսկ բնակչության վայրը որոշելիս հաշվի էր առնում ոչ թե գրանցման, աշխատանքային կամ էլ ծառայողական վայրը, այլ անձի բնակչության վայրը, այսինքն՝ այն տունը, բնակարանը, որտեղ հարցվողը գտնվել էր մարդահամարի պահին:

Հաշվարարների կողմից հարցաթերթերը լրացվեցին համաձայն «Հայաստանի Հանրապետության 2011 թվականի մարդահամարն անցկացնելու և մարդահամարի հարցաթերթը լրացնելու կարգի» հրահանգի: Համաձայն «Մարդահամարի մասին» ՀՀ օրենքի 10 հոդվածի՝ «Մարդահամարը կրում է պարտադիր բնույթ և հարցվողները պարտավոր են ճշգրիտ և սպառիչ պատասխաններ տալ մարդահամարի հարցաթերթերի բոլոր հարցերին: Յուրաքանչյուր անձ իրավունք ունի ծանոթանալու մարդահամարի հարցաթերթում իր մասին գրանցված տեղեկություններին»:

Մարդահամարի հարցաթերթը բաղկացած էր 3 բաժիններից.

1. հասցեամասից,
2. 33 անհատական հարցերից,
3. տնային տնտեսության բնակչության պայմանները բնութագրող 15 հարցերից,
4. տնային տնտեսության գյուղատնտեսությամբ զբաղվելը բնութագրող 4 հարցերից,
5. տնային տնտեսությանը տրվող 3 այլ հարցերից:

Մարդահամարի առաջին օրը մարդահամարի տեղամասի վարիչները վերահսկում էին բոլոր հաշվարարների ու հրահանգիչ–հսկիչների պարտադիր ներկայությունը: Որևէ հաշվարարի կամ հրահանգիչ–հսկիչի բացակայության դեպքում նրանք պարզում էին պատճառը և անհրաժեշտության դեպքում փոխարինում ռեգերվի հաշվարարով կամ հրահանգիչ–հսկիչով:

Հաշվարարները հաշվառումն անցկացնելիս շրջագայեցին իրենց տեղամասերի բոլոր տներն ու շինությունները՝ անկախ նրանից՝ բնակելի էին դրանք, թե ոչ, քանի որ չէր բացառվում ոչ բնակելի շինություններում որևէ մեկի բնակչության փաստը:

Մարդահամարի հաշվառման ընթացքում տեղեկություններ են հավաքագրվել.

- անհատական տնային տնտեսություններից, ընդ որում՝ մարդահամարի ընթացքում ամբողջ կազմով բացակա S/S անդամների վերաբերյալ տեղեկությունները ստացվել են հարևաններից, բնակչահագործման տեղամասերից և համատիրություններից,



- խմբային տնային տնտեսություններից (սոցիալական նշանակություն ունեցող կազմակերպություններ՝ մանկատներ, ծերերի և հաշմանդամների տուն-ինտերնատներ, ուղղիչ-աշխատանքային հիմնարկներ),
- ժամանակավոր կացատեղերից (հյուրանոցներ, հիվանդանոցներ, գիշերօթիկ դպրոցներ, ինչպես նաև քննչական մեկուսարաններ),
- մշտական բնակատեղ չունեցող անձանցից՝ անօթևաններից, ըստ նախապես հայտնի դարձած նրանց գիշերատեղերի,
- օտար պետություններում ՀՀ դիվանագիտական ներկայացուցչություններում և հյուպատոսական հիմնարկներում աշխատող ՀՀ քաղաքացիներից և նրանց ընտանիքի անդամներից:

Ժամանակավոր կացատեղ հանդիսացող կազմակերպություններում (հիվանդանոց, ծննդատուն, հյուրանոց, առողջարան և այլն) հաշվեգրումն անցկացվեց մարդահամարի առաջին օրը, իսկ հաջորդ օրերին նոր ժամանած անձանց համար, մարդահամարն անցնելու մասին տեղեկանքի բացակայության դեպքում, լրացվում էին հսկիչ թերթեր (Ձև 4):

Մարդահամարի անցկացման ընթացքում ժամանակավոր ներկա հաշվեգրված բոլոր անձանց հաշվարարները տալիս էին մարդահամարն անցնելու մասին տեղեկանք (Ձև 5) և զգուշացնում, որ տեղեկանքի պահպանումը պարտադիր է մինչև վերահսկիչ շրջագայության (շրջայց) ավարտը՝ հոկտեմբերի 26-ը ներառյալ:

Մեկից ավելի բնակարան ունեցող անձանց համար հաշվարարները լրացնում էին վերահսկիչ փաստաթուղթ (Ձև 6) և հարցվողին տալիս տեղեկանք մարդահամարն անցնելու մասին: Եթե որևէ տանը հաշվարարի կողմից մնացել էին չհաշվառված անձինք, հաշվարարները թողնում էին «Գրություն այն անձանց, ում դժվար է տանը գտնել», որով խնդրում էին ներկայանալ կամ զանգահարել հրահանգչական տեղամաս՝ մարդահամարի հարցերին պատասխանելու համար:

Մանկատներում, տուն-ինտերնատներում (ծերերի և հաշմանդամների), քրոնիկ հիվանդների համար նախատեսված հիվանդանոցներում և նմանատիպ կազմակերպություններում մշտապես բնակվողների հաշվառումն անցկացվեց այդ կազմակերպությունների աշխատակազմի ներկայացրած հաշվարարների կողմից:

Մշտական բնակատեղ չունեցող անձանց (անօթևանների) հաշվառումն անցկացվեց մեկ գիշերվա ընթացքում իրենց գիշերելու վայրում՝ նախապես նրանց գիշերելու վայրը ճշտելով ՀՀ ոստիկանության և տեղական ինքնակառավարման համապատասխան մարմինների հետ: Անօթևանների հաշվառումն անցկացվեց այն հաշվային տեղամասի կողմից, որի տարածքում գտնվում էր նրանց գիշերելու վայրը:

ՀՀ 2011թ. մարդահամարի ժամանակ ՀՀ ոստիկանության, ՀՀ ազգային անվտանգության ծառայության և ՀՀ պաշտպանության նախարարությունների կողմից առանձնացված և հրահանգավորված հաշվարարների միջոցով անցկացվեց փակ տարածքներում գտնվող բնակչության առանձին խմբերի՝ զինծառայողների, քննչական մեկուսարաններում գտնվող և ուղղիչ աշխատանքային հիմնարկներում պատիժը կրող անձանց հաշվառումը: Ընդ որում՝ ժամկետային զինծառայություն անցնողները, պայմանագրային զինծառայության մեջ գտնվողները, համաձայն «ՀՀ 2011 թ.



մարդահամարի հարցաթերթը լրացնելու (մարդահամարն անցկացնելու) կարգի մասին» հրահանգի, հաշվեգրվեցին իրենց տնային տնտեսությունների կազմում:

ՀՀ արտաքին գործերի նախարարության հետ համաձայնեցված կարգով արտասահմանում Հայաստանի ներկայացուցչությունների և հյուպատոսությունների կողմից առանձնացված և համապատասխան ուսուցում (հրահանգավորում) անցած աշխատակիցների միջոցով հաշվեգրվեցին օտարերկրյա պետություններում (միջազգային կազմակերպություններում) ՀՀ դիվանագիտական ներկայացուցչություններում և հյուպատոսական հիմնարկներում աշխատող ՀՀ քաղաքացիները և օտարերկրյա պետություններում նրանց հետ բնակվող ընտանիքի անդամները:

ՀՀ-ում արտասահմանյան պետությունների դիվանագիտական, առևտրական և այլ ներկայացուցչություններում աշխատող, դիվանագիտական անձեռմխելիությամբ օժտված օտարերկրյա քաղաքացիները և ՀՀ-ում բնակվող նրանց ընտանիքի անդամները, միջազգային նորմերի համաձայն, մարդահամարի ժամանակ հաշվառման ենթակա չեին:

ՀՀ տարածքում բնակվող օտարերկրյա քաղաքացիները և նրանց ընտանիքի անդամների հաշվառումն իրականացվեց ըստ բնակության վայրի՝ համապատասխան հաշվային տեղամասերի հաշվարարների կողմից:

Մարդահամարի անցկացման ժամանակաընթացքում ՀՀ Ազգային վիճակագրական ծառայության մարդահամարի վարչության աշխատակիցները գործողվեցին ՀՀ ԱՎԾ մարզային գործակալություններ և դրանց տարածքային բաժիններ՝ ապահովելու, վերահսկելու և աջակցելու մարդահամարի աշխատողներին: Նրանք շրջում էին մարդահամարի տեղամասերով, ընտրանքային կարգով ստուգում լրացված հարցաթերթերը, վերլուծում փաստաթղթերի լրացման ժամանակ թույլ տրված սխալները, պարզաբանում հրահանգի այն դրույթները, որոնք անբավարար էին յուրացվել հաշվարարների կողմից: Որպես կանոն, առաջին օրերին ավելի քիչ հարցաթերթեր էին լրացվում, քանի որ լրացված հարցաթերթերում կային սխալներ և թերություններ, հարցերի պատասխանների տրամաբանական անհամապատասխանություններ:

Յուրաքանչյուր օրվա վերջում հաշվարարները ներկայանում էին իրենց հրահանգչական տեղամասերը և հրահանգիչ-հսկիչներին ստուգման էին հանձնում լրացրած հարցաթերթերը: Մարդահամարի անցկացման ընթացքի մասին հատուկ հաշվետվական ձևերով հաղորդագրություններ էին ներկայացնում. հրահանգիչ-հսկիչները մարդահամարի տեղամասի վարիչներին, նրանք էլ՝ մարզային գործակալության տարածքային բաժինն, տարածքային բաժինները՝ մարզային գործակալություն, իսկ մարզային գործակալություններ՝ ՀՀ ԱՎԾ-ի մարդահամարի վարչություն՝ նախորդ օրվա ընթացքում հավաքագրված տեղեկատվության վերաբերյալ:



**6.3. ՀԵՏՄԱՐԴԱՀԱՄԱՐԱՑԻՆ ԸՆՏՐԱՆՔԱՅԻՆ ՎԵՐԱՀԱՄԱՐՆԵՐԻ ԾՐՋԱԳԱՅՈՒԹՅՈՒՆ**

Վերահսկիչ շրջագայությունը (շրջայց) անցկացվեց մարդահամարի հաշվեգրումից հետո՝ հաշվարարների կողմից բնակչության հաշվառման ամբողջականությունն ու ճշտությունը ընտրանքային կարգով ստուգելու համար: Ընդ որում, տվյալ հրահանգչական տեղամասի սահմաններում հաշվարարը վերահսկիչ շրջագայությունը անց էր կացնում ոչ թե իր, այլ մյուս հաշվային տեղամասում: ՀՀ 2011թ. մարդահամարի ավարտից հետո՝ հոկտեմբերի 22–26–ը, հրահանգիչ–հսկիչներն իրենց տեղամասերի հաշվարարների հետ միասին կատարեցին ընտրանքային վերահսկիչ շրջագայություն: Այն անցկացվեց բոլոր հաշվային տեղամասերում՝ դրանցից յուրաքանչյուրում ընդգրկելով բնակելի միավորների (շինությունների) 10%–ը: Բնակելի միավորների ընտրանքը կատարեց մարդահամարի տեղամասի վարիչը՝ հրահանգիչ–հսկիչի հետ համատեղ, հաշվարարի հուշատետրի 2–րդ աղյուսակում լրացված բնակելի շինությունների ցանկի հիման վրա:

Վերահսկիչ շրջագայության ընթացքում ստուգվեց՝ արդյոք տվյալ տանը (շինությունում) բնակվող տնային տնտեսությունում հաշվառման ենթակա բոլոր անձինք են անցել մարդահամար: Հաշվարարը համեմատում էր յուրաքանչյուր տնային տնտեսությունում հաշվառման ենթակա մարդկանց թվաքանակը՝ մարդահամարի հարցաթերթում նրանց անվանական առկայության հետ: Եթե տնային տնտեսությունում ի հայտ էին գալիս հաշվառման ենթակա անձինք, որոնց հաշվարարը չէր հաշվառել, հրահանգիչ–հսկիչը կամ հաշվարարը տվյալ անձի վերաբերյալ տվյալները գրանցում էին նրանց տնային տնտեսության հարցաթերթում՝ ավելացնելով նրան տնային տնտեսության անդամների ցուցակում և լրացնելով նրա վերաբերյալ տեղեկությունները, իսկ անհրաժեշտության դեպքում՝ նաև համապատասխան մարդահամարային փաստաթղթերը:

Եթե վերահսկիչ շրջագայության ժամանակ բացահայտվում էին հաշվառումից դուրս թողնված տնային տնտեսություններ, ապա դրանց համար լրացվում էին մարդահամարի նոր հարցաթերթեր, իսկ անհրաժեշտության դեպքում՝ նաև համապատասխան փաստաթղթեր: Շրջագայության արդյունքում լրացված հարցաթերթերը համարակալվում էին տվյալ հաշվային տեղամասի վերջին հարցաթերթից հետո՝ հերթական համարակալմամբ: Հատուկ ուշադրություն էր դարձվում հարցաթերթերում բացակայողների և ժամանակավոր ներկա գտնվողների վերաբերյալ կատարված գրառումների ճշգրտությանը:

Վերահսկիչ շրջագայության արդյունքում տեղ գտած փոփոխություններն իրենց արտացոլումն էին գտնում նաև տվյալ հաշվային տեղամասի ամփոփ տեղեկագրում:

Այսպիսով, ՀՀ մարզերի մարդահամարի, հրահանգչական և հաշվային բոլոր տեղամասերում հոկտեմբերի 22–ից 26–ը անցկացվեց բնակելի տների (շինությունների) ընտրանքային վերահսկիչ շրջագայություն (շրջայց): Ընտրանքն անցկացվեց Հայաստանի Հանրապետության շուրջ 850 000 բնակելի միավորների մոտավորապես 10%–ում: 85 000 բնակելի միավորներում հաշվարարների կողմից մարդահամարի



ժամանակ սխալմամբ հաշվառվել էր 47 մարդ, իսկ հաշվառումից դուրս էր մնացել 2 960 մարդ: Այսինքն, ՀՀ-ում բնակելի միավորների (շինությունների) 10% ընտրանքային վերահսկիչ շրջագայության ընթացքում վերականգնվել է մարդահամարի ժամանակ հաշվառումից դուրս մնացած 2913 մարդու (2960-47 մարդ) վերաբերյալ տեղեկատվությունը, որը կազմում է բնակչության շուրջ 0,1%-ը:

Վերահսկիչ շրջագայության (շրջայց) ժամանակ հաշվարարների կողմից հայտնաբերված սխալմամբ հաշվառված անձանց ամենաբարձր տոկոսը գրանցվել էր Երևան քաղաքում, որի 280000 բնակելի միավորներից ընտրված 28000-ում հայտնաբերվել է հաշվարարների կողմից չհաշվառված 1345 մարդ, որից 1042-ը՝ Մալաթիա-Սեբաստիա վարչական շրջանում, 127-ը՝ Նոր Նորքում, 24-ը՝ Էրեբունի վարչական շրջանում, 150-ը՝ Արաբկիրում, և 2-ը՝ Ավանում: Հանրապետության 10 մարզերում վերահսկիչ շրջագայության ընթացքում հաշվարարների կողմից հայտնաբերված՝ սխալմամբ հաշվառված անձանց թվաքանակը Արագածոտնի մարզում կազմել է 36 մարդ, Արարատի մարզում՝ 218, Լոռու մարզում՝ 234, Կոտայքի մարզում՝ 139, Շիրակի մարզում՝ 342, Սյունիքում՝ 110, Վայոց Ձորում՝ 409, Տավուշում՝ 80 մարդ:

Ամենաբարձր տոկոսը գրանցվել է Վայոց ձորի մարզում: Մարզի 15000 բնակելի միավորներից վերահսկիչ շրջագայությամբ (շրջայց) ընդգրկված 1500 շինություններում հայտնաբերվել է չհաշվառված 409 մարդ: Ամենացածր ցուցանիշը գրանցվել է Արմավիրի մարզում. 64258 բնակելի միավորներից ընտրված 6377-ում չէր հաշվառվել 14 մարդ:

Բացի այդ, բնակչության հաշվառման ամբողջական ընդգրկման նպատակով ՀՀ 2011թ. մարդահամարի կազմակերպման և անցկացման համապետական հանձնաժողովը մամուլով և հեռուստատեսությամբ հայտարարությամբ դիմեց հանրապետության բոլոր այն բնակիչներին, որոնց 2011թ. հոկտեմբերի 12-21-ը մարդահամարի նպատակով հաշվարարներ չէին այցելել, խնդրանքով, որ մինչև հոկտեմբերի 31-ը այդ մասին տեղեկացնեն ՀՀ ԱՎԾ մարդահամարի վարչություն և/կամ ՀՀ ԱՎԾ մարզային գործակալություններ: ՀՀ ԱՎԾ մարդահամարի վարչությունում և մարզային գործակալություններում 2011 թ. հոկտեմբերի 27-ից 31-ը սահմանվեց պատասխանատու աշխատակիցների հերթապահություն՝ չհաշվառված քաղաքացիների այցելություններն ու հեռախոսազանգերը գրանցելու նպատակով:

Ստեղծվեցին հանձնաժողովներ, որոնց անդամները բնակչության սահզանգերի հիման վրա մարզերում և Երևան քաղաքում կատարեցին այցելություններ համապատասխան հասցեներով և բաց թողնված տնային տնտեսությունների կամ անձանց համար լրացրեցին մարդահամարի հարցաթերթեր: Այդ միջոցառումների ժամանակ գրանցվեցին և տեղի ունեցան ավելի քան 200 հեռախոսազանգեր և այցեր:

Հանրապետության բնակչությունը, ընդհանուր առմամբ կարևորելով իր տրամադրած տեղեկատվության անհրաժեշտությունը, համբերատար պատասխանեց հաշվարարների բոլոր հարցերին՝ գիտակցելով, որ իրենց անկեղծ ու հավաստի պատասխաններն հանդիսանում են մարդահամարի արդյունքների որակի երաշխիքը:

Ցանկացած երկրում մարդահամարը հանդիսանում է ամենազանգվածային միջոցառումներից մեկը, որի ընթացքում, հաշված օրերի կտրվածքով, մարդկանց միջև





տեղի են ունենում միլիոնավոր հաղորդակցություններ (հարցուպատասխանային երկխոսություններ): Նման կարճ ժամանակահատվածում բազմամիլիոն և ինտենսիվ ռեժիմով երկխոսությունները երաշխավորված չեն անհասկացվածություններից, կոնֆլիկտներից, ծիծաղաշարժ և այլ բնույթի դիպվածներից: Այնքանով, որքանով մեզանից յուրաքանչյուրը ֆիզիկապես նույնական չէ, այդքանով էլ արդեն իսկ գոյություն ունեն տարբերություններ: Այդ տարբերություններն էլ են տարբեր: Դրանք տարբեր անձանց, տնային տնտեսությունների անդամների և այլոց կողմից կարող են որակվել որպես հաճելի կամ տհաճ, պարտադրված կամ անկաշկանդ, տանելի կամ անտանելի, ընդունելի կամ մերժելի և այլն:

Տարբեր երկրներում վերջին տարիներին անցկացված մարդահամարների ժամանակ, ցավոք, արձանագրվել են և՛ սպանություններ, և՛ ընդվզումներ, և՛ զանգվածային ձերբակալություններ ու դատավարություններ: Այս առումով, ՀՀ 2011թ. մարդահամարը հաճելիորեն տարբերվեց այլոցից, ինչը գլխավորապես պայմանավորված էր մեր բնակչության արտառոց բարեհամբույրությամբ: Այդուհանդերձ, ՀՀ 2011թ. մարդահամարի ընթացքում ևս արձանագրվեցին որոշակի անցանկալի դեպքեր և հատկապես ծիծաղաշարժ դիպվածներ:

Վերահսկիչ միջոցառումների իրականացման շրջանակներում ՀՀ ԱՎԾ աշխատակազմի նախաձեռնությամբ հարցումներ արվեցին ՀՀ բոլոր նախարարությունների, գերատեսչությունների աշխատակազմի ղեկավարներին, ՀՀ ԿԲ-ին՝ զուտ աշխատակիցների շրջանակում հարցում կատարելու միջոցով պարզելու, թե արդյոք նրանց տնային տնտեսությունները մարդահամար անցել են: ԱՎԾ աշխատակազմի, մարդահամարի վարչության և մարդահամարի և ժողովրդագրության բաժնի աշխատակիցները նշված գերատեսչություններից ստացված տվյալների հիման վրա այցելեցին և լրացրեցին բաց թողնված տնային տնտեսությունների մարդահամարի հարցաթերթերը:

Սակայն քիչ չէին դեպքերը, երբ նշված աշխատակիցներն առանց ճշտելու իրենց տնային տնտեսության անդամներից, թե արդյոք իրենց համար լրացվել է մարդահամարի հարցաթերթ ահազանգում էին՝ ասելով, որ իրենք դուրս են մնացել հաշվառումից: Վիճակագրության մարզային և Երևան քաղաքի բաժինների միջոցով ճշտվում էր՝ արդյոք տվյալ տնային տնտեսության համար մարդահամարի հարցաթերթ լրացվել է, թե ոչ, որպեսզի բացառվեր կրկնակի հաշվառումը:

Վերոնշյալ միջոցառման արդյունքում կազմվեցին մոտ 100 տնային տնտեսության հարցաթերթեր, որոնք դուրս էին մնացել հաշվառումից:

